

Che no esistessin dome trê dimensions, no lu veve di sigure scuiert jê, ma di rivâ adore a savê cualis che a jerin chês altris, chel po no, chel Mafalde no varès mai podût immaginâlu. Vada pe cuarte, il *Timp*, che come che a pandevin i filosofis des etis antighis al deve un sens a lis primis trê. Ma za cu la cuinte, il *Snait*, e veve scuiert vonde par fâ puest al Nobel te vetrine di cjase. Se il Nobel i fos interessât...

Pues crodi. Studiant il *dimensionomanimetri*, un machinari a forme di gubane eletriche che e veve metût adun dilunc de cuarantene, a saressin bastadis pocjts modificjis par strenzi il tamês e slargjâ i voi ai oms.



E lavorà come une sfolmenade, e une daûr chê altre, la machine i pandè lis dimensions di chest mont in rapuart a chei ce lu vivevin: il *Sunôr*, il *Nasebon*, la *Empatie*, la *Creativitât*, la *Fantasie*, la *Cjativerie*, il *Sticeboris*, la *Sgrimie*, il *Mastiefumate*... Al bastave cjapâ in man l'imprest, fracâ il boton "Invie dimensionament" e intun marilamp, sul schermi, si viodevin lis misurazions.

E veve scuiert plui di vincj dimensions, ma a 'nd jerin di sigûr altris. Ma intant... une maravee di scuierte! Un strument che al varès cambiât il mont!

No i restave che meti adun lis scjalis di misure. E cjapà la machine in man e le fasè partî. E velis li, lis “Mafalda’s dimensions”.

Benon par chês che si savevin za.

46 *Altece*, 168 *Lungjece* e 23 di *Largjece*. Centimetrîs, clare!

Pal *Timp* nol coventave nuie: al segnave la ore e nol si fermave.

Ben cui sunôrs. Il Dimensionomanimetri le considerave 31. Di sigure decibel, ma za li e scomençà a vê fastidis. La intensitât di un griâ di grîs no sarà migo compagne di un zes che al sgrie une lavagne? La sô dimension di *Sunôr* di ce cualitât jerie?

E pe *Sgrimie*, che e segnave 1005? E *Creativitât* 763, *Empatie*, 8,82; *Permalositât* 2,3987?

Ce misuris jerino? Ce significât vevie di dâi? E molà un porco, e ve li che la dimension *Uce* e passâ di 65 a 74. E varès viodût ancje il nivel di *Fastidi* rivâ a 23980, se te sere stesse no ves vût bielzà fracassât il dimensionomanimetri a fuarce di martieladis.

***CovidCurte day 20 - Conte nr. 5***

**#965**